

# kontuola

**KONTUOLA, Idolaz elkarte, ANTZUOLA. Kazetaria:** Marijo Deogracias **Erredakzio kontseilua:** Miren Anduaga, Gotzon Iparragirre, Patxi Kortabarria, Jone Larrañaga **Testuen zuzenketak:** Maripi Laskurain, Lierni Legorburu **Telefonoa eta faxa:** 76 65 08, Herri ikastetxea.

*Antzuolako hamabostekaria, 19 zenbakia. 1998ko ekainaren 19a.*


## San Juanak Uzarragan domekan

San Juan eguna astean denez, Uzarragan ekainaren 21ean, domekan, ospatuko dute udararen etorrera. Urteko gaurik luzeena iritsi aurretik sekulako jaiak antolatu da auzo horretan. Uzarragako jaietan herri bazkaria egingo da eta udal ordezkariak ere hantxe izango dira, aurreko korporazioetako zinegotzietekin bazkaltzen.

**U**zarragak garrantzi handia izan du beti Antzuolarentzat. Dirudienez, gure herriko lanbiderik ezagunena, larrugintza, Uzarragako tenplarioek irakatsitakoa da. Baina urteak pasa ahal, Uzarragako jaiak ere jaisten joan dira. Garai batean pleno berezia egiten zen Uzarragan, San Juan egunean. Aurtengo udal korporazioen arteko desafioa antolatu dute, Uzarraga eta Antzuolako Udalaren arteko harremanana gogoratzeke. Maleta karrera, zaku karrera, soka-tira eta kaskara jokoan aritu beharko dira oraingo udal korporazioa eta aurreko urteetakoak.

### Abesbatza, dantzariak eta txirindulariak

Madinaren Aita Gurea abestuko du herriko abesbatzak Uzarragako elizan emango den meza nagusian. Abesbatzak meza ostean ere beste zenbait kantu abestuko ditu. Meza goizeko 10:00etan izango da eta ondoren, 11:00etan luntxa eskainiko da, urteroko ohitura ez galtzeko. 11:30etan txirindulari lasterketa hasiko da. Peña Aiastuik antolatuta, herriko txirindulari gazteenak Etxezurin aterako dira Uzarraga gainera igotzeko. Herriko dantzarien saioa egongo da txirindulariak gora iritsi bitartean giroa alaitzen. Dantza saioa eguer-



*Iaz trikitilariak aritu ziren luntxa alaitzen. JUAN CRUZ ARGAZKIAK*

diko 12:30etan izango da. Bazkariaren ostean, 17:00etan hasiko da udal korporazioen arteko desafioa eta 18:00etan, berriz, bergarar eta antzuolarraren arteko olinpiada hasiko da. Gazteak antolatu du herriko olinpiada eta Uzarragan jokatu dute, iaz Kalebarrenge jaietan jokatu zuten txapelketaren jarraipena. Arratsaldeko 19:00etan Gezalaga anaia-arreben erromeria hasiko da eta jai giroan jarraitzeko 20:30etan Uza-

rragako jaitsiera egingo da, Gezalagatarraren kalejirarekin.

### San Juan bezpera

Ekainaren 23an, martitzena, San Juan bezperako dantza eta aureskua egingo dira. Aurretik, arbola jasoko da eta solstizioaren etorrera ospatzeko sua piztuko da. Herriko plazan egingo den ekitaldia 20:00etan hasiko da.

■ ■ ■  
*17:00etan hasiko da udal korporazioen arteko desafioa eta 18:00etan, berriz, bergarar eta antzuolarraren arteko olinpiada hasiko da*  
■ ■ ■



## Antiguako errota

Datorren zapatuan, ekainak 20, Antiguako errota eraberrituta ikusteko aukera izango da. Florentino Lamariano garia eta artoa ehotzeko errota konpontzen dabil 1988tik. Orduan ur-haundiak sekulako kalteak eragin zizkion errotari eta azkenean konpontzea lortu du. Erakustaldia eguerdiko 12:00etan izango da, Antiguan bertan.

## Antzuolako Herria beka

Antzuola Herria bekaren III. edizioa larrugintza ikertzeko izango da. Eskabideak aurkezteko epea ekainaren 30an amaituko da. Bekara aurkeztu nahi dutenek lizentziatuak izan beharko dute eta eskabidean ikerketaren nondik norakoak jaso behar dituzte. Informazio gehiago Antzuolako Udaletxean jaso daiteke.

## Pegatina lehiaketa

Idolazek jaietako pegatina lehiaketa antolatu du. Herriko jaietan euskara bultzatuko duen lelo onenaren sariketan parte hartu nahi dutenek ekainaren 30a arte dute lanak aurkezteko epea. Parte hartzaile bakoitzak nahi beste lan aurkeztu ditzake. Lanek euskarazko esaldi bat eraman beharko dute, baina horrekin batera marraskia ere egin daiteke. Lanak lagatzeko lekuak liburutegia eta udaletxea izango dira eta parte hartzaileek sobre itxi batean ipini beharko dituzte euren datuak alde batetik eta pegatinak bestetik.

## Pirinioetarako irteera

Gavarnie-Goriz-Perdido irteera antolatu du Arrolak ekainaren 27 eta 28rako. Izena emateko egunak ekainaren 22a, astelehena, eta ekainaren 23a, martitzena, dira, 19:00etatik 20:00etara Arrolaren lokalean.



Sagar dantzan jende askok hartzen du parte. JUAN CRUZ ARGONZOLA

# San Pedrotan jai

**Datorren asteburuan ospatuko dira Kalebarrengo jaiak. Suzko zezena, sagar dantza eta asto karrera antolatu ditu Kalebarrengo jai batzordeak.**

Ekainaren 26an hasiko dira Kalebarrengo jaiak. Eguakitzean Kiki, Koko, Moko eta Flax pailazoak arituko dira Zurrategin arratsaldeko 18:00etan. Gauean, berriz, Gezalaga anai-arrebak arituko dira erromerian. Gau erdian, suzko zezena aterako da gaua argitzera. Zapatu goizean kirolaren txanda izango da. Peña Aiastuik ginkana antolatu du eta marraztea atsegin dutenek marrazki lehiaketan aritzeko aukera izango dute. Arratsaldean, jaietan falta ezin diren pilota partiduak jokatu dira. Olalde Pilota Elkarteak bi norgehiagoka antolatu ditu: Etxabe-Bengoetxea eta Antxia-Gartzaren artekoa eta Ubera-Urberuaga eta Egimendia-Bengoetxea.

Gauean auzokoan txanda izango da, auzo-afariarekin; hala ere herritar guztiei gonbitea egin diete afalosterako.

“Txinparta” taldearen dantzaldia afalostean izango da eta gau erdian urteroko sagar dantza eta Idolazek antolatu duen piropo eta irain lehiaketaren sari bana-keta. Idolazkideek bertso paper lehiaketa irabazi duenaren saria ere orduan banatzeko asmoa dute.

## Asto karrera

Garai batean urtero egiten zen asto karrera, baina aspaldian bi urtean behin izaten da. Iaz ez zen egon asto lasterkeriarik eta, beraz, domekan, ekainak 28, arratsaldeko 18:00etan egingo da Kalebarrenen asto karrera.

## Herri proba barik

Iaz herri probak jokatu ziren Antzuola, Osintxu eta Bergararen artean. Aurtentzen, ordea, Aiherrako jaiak direnez, bertara joango dira Gaztetxeoak, Antzuolan jokatu zuten herri proben itzuliko txapelketa jokatzera.

**KALEGOI 19** ☎ 943 76 64 07

*Tomas Gezalaga*

**ANTZUOLA BERGARA**

- Apainketarako eta industriarako pinturak •
- Paper margotuak •
- Moketak eta tapizatuak •



Zurrategi plaza 4, behea ANTZUOLA Tf. eta faxa 943 78 71 80

Sukalderako eta bainurako altzariak  
Altzari rustikoetan  
espezializatuak



# Koldok hemezortzi urte AKEEn

## Berak eta beste bi juntakidek AKE lagatzea erabaki dute

**Zenbat urtetan aritu zarete lehendakaritzan?**

Lehendakari bi urte, baina lanean hemezortzi egin ditut.

**Zergatik erabaki duzu Antzuola Kirol Elkarteko lehendakaritza lagatzea?**

Denbora asko ibili gara lanean, batzuk zortzi urte, baina nire kasuan hemezortzi eta nekatuta gaude. Jadanik ez daukagu lanerako horrenbesteko gogorik. Orain batzordean zazpi lagun daude eta gure asmoa ez da dena lagatzea. Momentuan nire anaiak, neuk eta besteiren batek lagako genuke. Hor sartzeko prest dagoen jende berria eskatzen dugu. Hala ere, ez daukagu inoren berri. Eskolarren kirolaz ere arduratzen naiz eta hori ez dut lagako.

**Inor aurkitzen ez baduzue, zer egingo duzue?**

Jokalarien gurasoak arduratzen izango litzateke egokiena. Bergaran eta Arrasaten horrela eramaten da eta, beraz, ez litzateke ezer berria izango. Hau, noski, umeen mailari dagokionez; zeren preferente mailan, eurak eraman behar luke.

**Zer ikasi duzu tarte horretan?**

Gauza asko; Antzuolako ume denak ezagutzen ditut eta pozgarria da kallean guztiak zu agurtzea, oso polita da.

**Zer gogoratzen duzu gustoren?**

Iaz lehenengo errejional mailara igotzea. Hasi ginenean gure asmoa zen lau talde ateratzea eta laurak daude gaur egun martxan.

**Nola ikusten duzu AKE?**

Nire ustez aurrera egin dezake. Dirulaguntza aldetik nahiko ondo dago, ez da arazorik egoten laguntza lortzeko eta hori oso garrantzitsua da. Falta dena lanerako jende gaztea sartzeta da. Instalazio aldetik, nire ustez, nahiko ondo gaude, behintzat futbol taldeetan.

**Zerk ematen du lan gehien?**

Entrenamenduetara igotzeko. Futboleko jokatu izan dugu urte askotan eta erakusteko moduan ginen, baina orain Federazioan eta eskolar mailan tituludun jendea eskatzen dute eta ez

daukagu horrelakorik. Federazioak erraztasunak ematen ditu titulua lortzeko baina jendea ez dago gertu 2-3 hilabete egiteko titulua lortzeko.



Koldo Madariaga, AKEko lehendakaria.

## Euskal presoak Euskal Herrira

Euskal Presoak Euskal Herrira plataformaren aurkezpena egin zen joan den ostiralean. 100 bat lagun elkartu ziren herriko plazan arratsaldeko 20:00etan. Plataformako kideek euren asmoen berri eman ondoren, ekimenaren aldeko sinadurak batu zituzten. Hala ere, eta norbaitek sinadura eman nahi izango balu, martitzenero elkartzen dira plataformako kideak parroki aretoan arratsaldeko 19:00etan.



**TXOMIN**

garajea

Mekanika orokorra

Lizarragako hiribidea 8 ANTZUOLA  
Tf. 943 78 70 77

**SURPE**

taberna

Girorik  
jatorrena!

Herriko plaza 2, Antzuola  
Tf. 943 76 64 97

**igor eta Txomin**

Pintura orokorrean.

Paper, tela, binilo, kortxo... estaldurak.

Gotelea, iztukuak eta

bestelako imitazioak.

ANTZUOLA BERGARA  
☎ 943 76 60 39 ☎ 943 76 19 98

**LARREA**


**TABERNA**

Kalebarren 17  
ANTZUOLA



Jesusa Azkarate:

# “Santimontxon eta Pedro izeten zien txistularixak”



**S**an Pedro jaiak zuhaitzigoerarekin hasten ziren?

Bezperan ekartzen zan, gabez, eta ipiñi be bai; jendia jaikitzen zanerako ipiñitta egoten zan.

Azkenengo urtetan egunez egitten da, baiña lehen, gerra aurretik, gabaz egitten zan, izkutuan bezela. Arbolia harripatu egitten zan, permiso barik hartzen zan da, eta gabez egin bihar izeten zan. Lora koroia ipintzen jakon goixan, aurretikan neskak eginda eta itxulapikua. Mutil gaztiak ekartzen zeben.

**San Juan suaren ondoren, San Pedrotako suaren txanda izaten zen?**

Azkenengotan erreka baztarran egitten zan, Zurrategi aldera. Lehen erreka zabala zan. Toki asko etzeguan salto egitteko baiña baten batzuk ibiltzen zian. Erretzen zan dana jasotzen zeben mutil gaztiak aurreko egunetan.

**Mezarik ematen zen auzoan?**

Urten batzutan, bi urtetan edo, plazuelan, baiña, parrokixan emoten zan. San Bartolomen hasi zan 1940xan mezia emoten, ur-haundixak egon zien urte horretan agostuan eta elizia garbitzen ibilli giñanok esan giñuan meza bat emon bihar zala han, eskerrak emoten ezebe etzalako pasau eta orduan hasi zan mezia emoten han. Baiña San Bartolome egunian emoten zan bakarrik.

**Berbenarik egiten zen?**

Dantza asko etzan egoten: trikitixa, pasodobliak, habanerak eta beste pieza batzuk... Neure denporetan Santimontxon eta Pedro izeten zien txistularixak. Bezperan danborra eta dulzaiña izeten

zian berbenia. San Pedro egunian, filarmonista bat eta pandeua be etortzen zian, kanpotik. Antzuolan be bazian musikua, Bazterretxeko Alejandro be ibiltzen zan joten eta Iraustako Benitok dulzaiña jotzen zeban. Jaixetara kanpotik jende asko etortzen zan, oin baiño gehixago. Batzuk oiñez eta beste batzuk bizikletan etortzen zian.

**Eta San Pedro egunean?**

Atsaldian jokuak egitten zian: kaskara jokua, zaku karrera eta asto karrera. Eta beste bat izeten zan maleta karrera; oin ezta ikusten hori baiña lehen asko egitten zan. Maleta bat erropaz beteta ipintzen jakon baikoitzari eta gero zeini tokatzen jakon, harek biaje baikoitzian erropa bat jazten zeban eta zein bizkorren eta onduen jazten zan, harek irabazten zeban.

Maleta karrera askotan egitten zan eta oin ezta ikusten hori. Zaku karrera be... oin zakua billatzia be kosta egingo litzake.

**Asto asko egoten ziren asto karran?**

Dozenaren bat lagun ibiltzen zian. Enaiz akordatzen zeinek irabazten zebanik, baiña Akiño neska batek lehenengo premixua irabazi zeban urte baten. Harrezkero be ibilli zan baiña orduan ezban irabazi.

**San Pedrotan izaten zen lorontzien lapurretan?**

Iñun baldin bazeguan bentanetan, jendia barrura sartzen ibiltzen zan. Karpuan gelditzen baldin bazan, toki batetik bestera aldatu eta hola ibiltzen zian ties-tuak. Oindio be San Pedro bezperan barrura sartzen ibiltzen gara... akordatzen baldin bada baten bat...



Jesusa Kalebarrenen bizi da oraindik.

“Arbolia bezperan ekartzen zan... eta jendia jaikitzen zanerako ipiñitta egoten zan”

**GOROSTI**  
**Taberna**

☎ 943 76 62 96  
Zurrategi plaza ANTZUOLA

**LEKU-BERRI**  
**MERENDEROA**

Janariak eta edariak

Tf. 943 76 60 94

**zabalo**

IGELTSEROTZA

Jose Luis Zabalo

Birgaitzeak • Fatxadak  
Teilatuak • Sukalde eta bainu gelak  
Kalegoi 9, 1a., ANTZUOLA. Tf. 943 76 60 89

KALEGOI 19 ☎ 943 76 64 07

*Tomas Gezalaga*

ANTZUOLA BERGARA

• Zoruen kutxilatuta eta barnizaketa •